


MFUKO WA KIBAHA'I






MFUKO WA KIBAHA'I



IMETENGENEZWA KATIKA MSINGI WA WARAKA "KUUNGANISHA MIOYO
KWENYE MFUKO"ULIOTAYARISHWA NA BARAZA LA KIROHO LA KITAIFA
LA WABAHA'I WA AFRICA YA KUSINI, MACHI 2001



TOLEO HILI IMETAYARISHWA NA BARAZA LA KIROHO LA KITAIFA LA
WA BAHAI WA TANZANIA, OKTOBA 2011

1. Ahadi

Ahadi ni mkataba au maagano. Ahadi ya milele au Ahadi kuu ni Agano la Mungu kwa wanadamu kwamba Yeye daima atatupenda na kututumia mwongozo mtakatifu. Kuja kwa Bahá'u'lláh ni utimilizo wa Ahadi ya Milele ya Mungu kwa zama hizi kama kuja kwa Musa, Kristo na Mohammed kulikuwa utimilizo wa Ahadi ya Milele ya Mungu kwa zama zilizopita.

Ndani ya Ahadi ya Mungu ya Milele, Bahá'u'lláh alianzisha Ahadi ndogo. Ahadi ndogo ni Agano la Bahá'u'lláh la umoja. Alilifanya hili kwa kumteua 'Abdu'l-Bahá kama Kitovu cha Ahadi yake. Abdu'l-Bahá anaiendeleza Ahadi kwa Wosia na Agano lake ambamo anawaamuru Wabahá'i kugeukia kwenye Utaratibu wa Utawala wa Bahá'u'lláh ambao unasimamiwa na Mlinzi na Nyumba ya Haki ya Ulimwengu.

Sehemu yetu ya Ahadi ni kumtambua Mdhihirishaji wa Mungu na kutii sheria zake na mafundisho.

Bahá'u'lláh aliandika:

"Wajibu wa kwanza ulioamriwa na Mungu kwa watumishi wake ni utambuzi wa Yeye ambaye ni asili ya Pambazuko la Ufunuo wake na Chemchemi ya sheria Zake, ambaye huwakilisha Uungu katika Ufalme wa Hoja Yake na katika ulimwengu wa muumbo. Yeyote atimizaye wajibu huu amefikia mema yote; na yeyote ambaye amenyimwa jambo hilo, amepotea, ingawa yeye ni mwanzilishi wa kila tendo jema. Imempasa kila mmoja afikiaye daraja hili bora kabisa, kilele hiki cha utukufu mkuu kabisa, kutii kila amri ya Yeye ambaye ndiye Haja ya Ulimwengu. Majukumu haya pacha hayatenganiki. Moja halikubaliki bila ya lingine. Hivyo ndivyo

ilivyokwisha amriwa na Yeye ambaye ndiye Chanzo cha upuzio Mtakatifu.”

Bahá'u'lláh, Kitáb-i-Aqdas

Ni zawadi kuu kuweza kumtambua Bahá'u'lláh. Watu wengi hawajapata zawadi hii. Hadithi ifuatayo inawahusu watawa Fulani walioishi wakati wa Bahá'u'lláh.

Kwenye ziara ya nne ya Bahá'u'lláh huko Haifa (1891), Bahá'u'lláh alisimika hema Lake karibu na pango la Eliah na karibu na nyumba kubwa ya utawa. Watawa waliokuwa wanaishi katika nyumba hiyo walikuwa wametoa maisha yao kwa ajili ya kungojea kurudi kwa Kristo. Walitumia siku zao wakiomba kwa ajili ya tukio hili.

Wakati Bahá'u'lláh alipofunua Waraka, alisema kwa utukufu mkuu mno na kuvutia usikivu wa watawa ambao walitoka nje ya nyumba yao kubwa ya utawa ili kushuhudia tukio hilo. Watawa hawa walimuona Bahá'u'lláh, kusudi la utafiti wao wa maisha. Walimsikia akifunua moja ya Nyaraka kuu mno za Maandiko Matakatifu na bado hawakumtambua Bwana wao.

Sisi hatukumuona Bahá'u'lláh. Hatukusikia sauti yake wakati akifunua Nyaraka zake lakini tumepewa zawadi kutoka kwa Mungu ya kuweza kumtambua Yeye. Ni zawadi kuu iliyoje. Je, Mungu anatarajia nini kutoka kwetu?

Baada ya kumtambua Mdhihirishaji wa Mungu, sharti tutii sheria na Mafundisho Yake. Bahá'u'lláh anasema moja halikubaliki bila ya lingine.

2. Nguvu ya Ahadi

Tukiwa waaminifu kwa sehemu yetu ya Ahadi kwa kumtambua Mdhahirishaji wa Mungu na kutii sheria na Mafundisho Yake, tunavutia kwetu nguvu ya Ahadi. Nguvu ya Ahadi hutulinda na kutuwezesha kukua kiroho.

Unaweza kufikiria nguvu ya Ahadi kama utambi wa mshumaa. Mshumaa umetengenezwa kwa nta na utambi. Nta inayo nguvu kutoa joto na mwanga, lakini bila utambi huwezi kuwasha mshumaa na kupata joto na mwanga vilivyohifadhiwa katika nta. Ndivyo ilivyo kweli juu ya uwezo wa Mungu. Uko pale na tayari kwetu kuutumia, lakini hatuwezi kuufikia mpaka tujifungamanishe nao. Na njia ya kujifungamanisha na uwezo huo ni kupitia Ahadi.

"Hakuna roho ihuishwayo; Hakuna jicho liangaziwalo; Hakuna sikio lisisimuliwalo; Na hakuna moyo unaoweza kuonyesha hisia takatifu isipokuwa kupitia Ahadi."

'Abdu'l-Bahá

Sehemu moja ya Ahadi ni uwezo wake kutulinda kutokana na nguvu kinzani duniani ambazo hutuzuia kutomkaribia Mungu. Ni kama kuwa ndani ya ngome.

"Ewe Mwana wa Kuwa!"

Upendo wangu ndiyo ngome yangu; anayeingia humo yu salama salimini, na anayeipa kisogo hakika atapotea na kuangamia".

Bahá'u'lláh

Sehemu nyingine ya Ahadi ni uwezo wake kutubadilisha kiroho. Kadiri tunavyojitahidi kuelewa mafundisho na sheria za Bahá'u'lláh na kuziweka katika matendo maishani mwetu, tunakua kiroho. Tunabadilika. Tuna badilika kutoka hali ya kinyama na kuelekea hali ya kiroho. Tunaifanyia kazi kumtii Baha'u'llah; tunahitaji kuwa na nidhamu. Lakini kadiri tunavyojizoesha, tunakuwa na nguvu zaidi.

Kuna mafundisho mengi na sheria ambazo lazima tuzifuate, lakini kati yake kuna baadhi ambazo ni za msingi ambazo ndizo chimbuko la ukuaji wetu wa kiroho.

Hatua ya 7 katika Mabadiliko ya Kiroho

1. Sema kila siku mojawapo ya sala ya faradhi kwa ibada safi ya Kiroho.
2. Kusema kila siku 'Allah-u-Abhá mara tisini na tano ili kupata uzoefu wa kiroho uliorutubishwa unoletwa na kitendo hiki rahisi cha tafakari ya kiibada.
3. Kusoma mara kwa mara Maandiko Matakatifu, hasa kila asubuhi na jioni, kwa heshima kuu, uzingativu na fikra.
4. Kutafakari juu ya mafundisho kwa njia ya ibada, ili tuweze kuyaelewa kwa undani zaidi, kuyatimiza kwa uaminifu zaidi, na kuyatoa kwa usahini zaidi kwa wengine.
5. Kujitahidi kila siku kubadilisha matendo yetu ili yafanane na daraja la juu lililomo ndani ya mafundisho.
6. Kufundisha Imani
7. Kutumikia Imani bila ubinafsi na kutekeleza kazi zetu za kibiashara au nyinginezo ili kujitafutia riziki sisi wenyewe.

Ni ipi kati ya hatua hizi saba inayohusiana na Mfuko? Jibu ni hatua namba saba: Kutumikia Imani bila ubinafsi na kutekeleza kazi zetu za kibiashara au nyinginezo ili kujitafutia riziki sisi wenyewe. Kwa nini? Kwa sababu moja ya huduma ambayo tunaweza kuifanya katika Imani ni kuchangia kwenye Mfuko. Tunapotoa kwenye Mfuko, tunaandaa nyenzo zinazo hitajika kuhimili kazi ya mashirika ya Imani na shughuli zake. Bila ya mhimili huu mashirika ya Imani hayawezi kufanya kazi na shughuli za Imani haziwezi kutekelezwa.

3. Kudhihirisha Imani yetu kupitia Matendo

Ni sharti tudhihirishe imani yetu katika matendo siyo maneno tu. Kutoa kwa ajili ya Mfuko ni njia moja ambamo tunadhihirisha imani yetu kwa matendo na kuonyesha kwa matendo yetu upendo wetu wa Imani na shauku yetu kuiona ikiendelea.

"Sema; Acheni ukweli na adabu viwe pambo lenu. Msijiachie ninyi wenyewe kunyimwa vazi la uvumilivu na haki, ili harufu tamu ya Utakatifu iweze kupeperushwa kutoka mioyoni mwenu juu ya viumbe vyote. Sema: Jihadharini enyi watu wa Baha', msije mkatembea katika njia za wale ambao maneno yao hutofautiana na matendo yao. Jitahidini ili muwezeshwe kudhihirisha kwa watu wa dunia ishara za Mungu, na kuonesha wazi amri Zake. Acheni matendo yenu yawe mwongozo kwa binadamu wote, kwa kuwa shughuli za watu wengi mno, wakiwa wakubwa au wadogo, hutofautiana na mwenendo wao. Ni kwa kupitia matendo yenu kwamba mnaweza kujitofautisha wenyewe kutoka wengine. Kwa kupitia hayo wangavu wa nuru yenu utaweza kuangaza dunia nzima. Ni mwenye furaha mtu yule ambaye husikia ushauri Wangu na hutii maagizo yaliyoamuriwa na Yeye Ambaye ndiye Ajuaye Yote, Mwenye Hekima Kabisa."

Bahá'u'lláh

"Kila Mbaha'i haijalishi ni maskini jinsi gani, sharti atambue ni wajibu mkubwa jinsi gani ambao anapaswa kuubeba katika jambo hili, na lazima awe na imani kwamba maendeleo yake ya kiroho kama muumini katika utaratibu wa Ulimwengu wa Bahá'u'lláh yatategemea kwa kiasi kikubwa juu ya kiwango ambacho huthibitisha, kwa matendo, kuwa tayari kusaidia kimwili mashirika matakatifu ya Imani yake."

Shoghi Effendi

"Mfuko wa hazina wa Kibaha'i ni asasi ya Imani ya Bahá'í. Ina kazi kubwa mbili. Moja ni kukidhi mahitaji ya kifedha ya imani ili ujumbe wa Bahá'u'lláh uweze kufikishwa kwa koo zote za ulimwengu. Pili ni kutoa njia inayofaa ambayo kwayo kila muumini anaweza kutathmini kipimo na aina ya Imani yake, na kuhakikisha kwa vitendo nguvu wa upendo wake na mwambatano kwa Hoja."

Kwa niaba ya Shoghi Effendi (Miongozo ya Mlinzi uk. 31)

"Pamoja na kufundisha, kila muumini anaweza kusali. Kila muumini anaweza kujitahidi kufanya 'maisha yake mwenyewe ya ndani na tabia ya faragha kuonesha katika sura zao nyingi, utukufu wa kanuni zile za milele zilizotangazwa na Bahá'u'lláh'. Kila muumini anaweza kuchangia kwenye Mfuko. Siyo waumini wote wanaweza kutoa hotuba hadharani, siyo wote wanaitwa kutumikia kwenye mashirika ya kiutawala. Lakini wote wanaweza kusali, wanaweza kupigana vita vyao wenyewe vya kiroho, na huchangia Mfuko."

Nyumba ya Haki ya Ulimwengu, Chemchemi ya Muongozo UK. 38

"Kuchangia kwenye Mfuko wa Kibahá'í hufanyiza kitendo cha nidhamu ya kiroho ambayo ndio msingi halisi wa maisha ya kiibada ya mtu binafsi. Asiwepo muumini ambaye hatambui heshima ya kuchangia kwenye maendeleo ya Hoja ya Mungu, bila kujali hali yake ya kimwili. Zoezi la kuchangia kwenye Mfuko huimarisha uhusiano kati ya muumini na Hoja na huongeza hisia yake ya kujifungana nayo. Mathibitisho Matakatifu hurudi juu ya wale ambao hutoa sehemu ya rasilimali zao za kidunia katika moyo wa kujitoa dhabihu, uliohamasishwa na upendo wao kwa Imani na shauku ya kusaidia katika maendeleo yake."

Nyumba ya Haki ya Ulimwengu, September 17, 1992

"Wakati mtu anapomkubali Bahá'u'lláh kama Mdhihirishaji wa Mungu kwa Zama hizi na kuingia katika kusudi takatifu- anakuwa mfanyakazi- mwenzi katika Hoja ya Mungu na hupokea baraka ya kuruhusiwa kutoa mali zake za kimwili, haijalishi ni kidogo jinsi gani, kwa kazi ya Imani..."

Nyumba ya Haki ya Ulimwengu , 7 Agosti 1985

4. Kuchangia kwenye Mfuko Hukuza Sifa zetu za Kiroho

Tunapokuwa waaminifu kwenye sehemu yetu ya Ahadi kwa kumtambua Mdhihirishaji wa Mungu na kutii Sheria Zake na mafundisho, tunavutia kwetu nguvu ya Ahadi na nguvu hii hutulinda na kutuwezesha kukua kiroho. Kukua kiroho humaanisha kupata sifa za kiroho. Kuchangia kwenye Mfuko hutusaidia kukuza baadhi ya sifa za muhimu sana zinazohitajika kwa ukuaji wetu wa kiroho. Baadhi ya sifa hizi ni pamoja na: ukarimu, kujitenga na kujitoa dhabihu.

Ukarimu

*"Kutoa na kuwa mkarimu ni sifa Zangu; heri ni yake yule
ajipambaye kwa njema Zangu."*

Bahá'u'lláh, kutoka Maneno Yaliyofichwa-Kiajemi Na. 49

*"Lazima tuwe kama mchirizi au chemchemi ambayo wakati wote
humwaga vyote vile vilivyomo ndani mwake wakati wote ukijazwa
tena kutoka kwenye chanzo kisichoonekana. Kuwa wa kutoa wakati
wote kwa manufaa ya wenzetu bila kuzuiwa na woga wa umaskini
na kutegemea kwenye baraka zisizokwisha za Chanzo cha utajiri
wote na mema yote - hii ndiyo siri ya maisha sahihi."*

Shoghi Effendi, Maagizo ya Mlinzi, uk. 32

Ukarimu humaanisha kutoa kwa uhuru chochote tulicho nacho bila kujijali au kujifikiria sisi wenyewe. Ni sifa njema ya Mungu na tunaombwa kujipamba wenyewe kwa njema hii bila kuwalia kama sisi ni matajiri au maskini. Tunapochangia kwenye Mfuko kutokana na upendo wetu kwa Imani na bila kujijali sisi wenyewe na faida zetu, tunakuza sifa ya ukarimu.

Hadithi ifuatayo inamhusu Mkono wa Hoja ya Mungu Amelia Collins.

Mkono wa Hoja ya Mungu Amelia Collins

Siyo Wabahá'i maskini peke yao waliojitoa dhabihu kwa ajili ya Mfuko, Wabahá'i wengi matajiri pia walijinyima starehe na raha kwa ajili ya kutoa kwa ukarimu kuchangia Imani. Mmoja wao alikuwa Mkono wa Hoja Amelia Collins ambaye alikuwa tajiri sana lakini aliishi maisha ya kujinyima sana na alitoa fedha nyingi kwa ajili ya Mfuko. Alitumia kidogo kwa mahitaji yake na wakati anaelekea mwisho wa maisha yake, aliishi katika chumba kimoja akiwa na vitu vichache sana. Furaha yake ilikuwa katika kutoa mali zake kwa ajili ya uendelezaji wa Imani kipenzi chake. Kamwe hakutaja chochote kuhusu michango yake ya ukarimu kwa Mifuko mbalimbali na kamwe hakutarajia kupokea shukrani au pongezi, lakini michango yake ya kimia ilitumika kwa ajili ya ununuzi wa ardhi za maeneo makubwa vya wakfu kwenye Makao Makuu ya Ulimwengu ya Kibahá'i, kujenga Nyumba za Ibada na Baha'i Senta, kuchapisha vitabu, kutekeleza miradi ya ufundishaji duniani pote na kusaidia watangulizi.

Jambo lenye thamani kubwa kabisa kuhusu zawadi kubwa za fedha alizozitoa daima kwa ajili ya Imani, lilikuwa ni ule moyo ambao kwao zilitolewa. Tangu siku alipomkubali Bahá'u'lláh, Bi. Collins aliweka wakfu maisha yake kwa ajili ya Hoja Yake na kutumikia Imani yake katika njia mbalimbali, akitoa muda wake na nguvu mpaka pumzi yake ya mwisho.

Kujitenga

"Ikiwa mtu anataka kujipamba mwenyewe kwa mapambo ya dunia, kuvaa mavazi yake, au kushiriki manufaa yanayoweza kumjalia, hakuna madhara yanayoweza kumpata, ikiwa hataruhusu chochote

kile kuingilia katikati yake na Mungu, kwani Mungu ameamuru kila kitu chema kiwe kimeumbwa mbinguni au duniani, kwa wale ambao ni watumishi Wake ambao humwamini kikweli. Kuleni, Enyi watu, vitu vizuri ambavyo Mungu amewaruhusu, na msijinyime baraka Zake za ajabu. Toeni shukrani na sifa Kwake, na muwe wa wale ambao hushukuru hasa."

Bahá'u'lláh, Makusanyo, uk. 276

Je, Mungu anaturuhusu kuvaa nguo nzuri kabisa, kukaa katika nyumba nzuri kabisa, kula chakula kizuri kabisa? Je, Mungu anaturuhusu kuwa matajiri? Jibu kwa maswali yote haya ni ndiyo. Lakini kuna sharti. Tusiruhusu vitu hivi kuingilia kati yetu na Mungu. Kwa maneno mengine, sharti tujitenge kutoka vitu hivi.

"Safisha kutoka mioyoni mwenu upendo wa vitu vya kidunia, kutoka kwenye ndimi zenu kila kumbukumbu isipokuwa kumbukumbu Yake, kutoka kwenye utu wenu chochote kinachoweza kuwazuia kuuona uso Wake, au kuwashawishi kufuata vishawishi vya matakwa yenu maovu na yaliyooza."

Bahá'u'lláh, Makusanyo, uk. 275

"Ewe Mwana wa Vumbi! Yote yaliyo mbinguni na duniani nimeamuru kwa ajili yako, isipokuwa moyo wa mtu, ambao nimeufanya makao ya Uzuri na utukufu Wangu; lakini umempa nyumba Yangu na makao Yangu mwingine zaidi Yangu; na wakati wowote udhihirisho wa utakatifu Wangu alipotafuta makao Yake,

alimkuta mgeni hapo, na pasipo makao, aliharakia kwenye kimbilio la Mpendwa. Hata hivyo Nimeificha siri yako na sikutaka aibu yako.”

Baha’u’llah, Maneno Yaliofichwa kutoka Kiajemi Na 27

“Ewe Mwana wa Mtu! Unataka dhahabu, lakini Mimi nataka uwe huru nayo. Unajidhanja tajiri ukiwa nayo, lakini Natambua utajiri wako katika kujitakasa nayo. Kwa uhai Wangu! Hii ndiyo hekima Yangu na hilo ni wazo lako; njia yangu itapatana je na yako?”

Bahá’u’lláh, Maneno Yaliyofichwa kutoka Kiarabu Na. 56

Mfalme na Darweshi

Kulikuwa darweshi ambaye alitangatanga nchi nzima. Hakuwa na nyumba, hakuwa na mahali pa kukaa wala fedha yoyote. Mali yake pekee ilikuwa shanta ndogo ambayo alizoea kuibeba begani mwake. Siku moja, alipokuwa anapita kasri ya mfalme, mfalme alimkaribisha ndani ya kasri yake. Mfalme alikuwa tajiri sana na alikuwa na dhahabu nyingi na fedha. Mfalme alimwambia darweshi kwamba alitamani kuacha nyuma majukumu yake yote na kutangatanga nchi nzima jinsi alivyokuwa akifanya darweshi. Hivyo darweshi alimhamasisha mfalme kuandamana naye. Mfalme aliamua kuiacha kasri yake nzuri na dhahabu zake na fedha na kwenda na darweshi. Baada ya kutembea mwendo wa kilomita 10 hivi darweshi alisimama na kusema, “Ah, lazima nirudi kwenye kasri yako, nimesahau shanta yangu. Siwezi kuendelea bila kuwa nayo.” Mfalme alimtazama darweshi kwa mshangao na kusema, “Nimeacha nyuma kasri yangu, ufalme wangu, dhahabu zangu zote na fedha, na wewe huwezi kuishi bila shanta yako ndogo?”

Kutoka kwenye hadithi ya hapo juu tunajifunza kwamba kujitenga hakuna uhusiano wowote kati ya kuwa tajiri au maskini. Sote, tukiwa tajiri au maskini, tunahitaji kukuza sifa yetu ya kujitenga.

Kuchangia kwenye Mfuko ni njia ya kivitendo ambamo tunaweza kukuza sifa yetu ya kujitenga, hasa kama michango yetu inatulazimu kuacha kitu kingine ambacho tunge kifanya kwa ajili yetu wenyewe.

Kujitoa Dhabihu

Kabla ya kupata sifa za kiroho za juu kabisa sharti tuwe tayari au tutoe dhabihu sifa zetu za kidunia za chini. Katika kueleza jinsi dhabihu inavyotusaidia kukuza sifa zetu za kiroho, 'Abdu'l-Bahá alitumia mfano wa chuma. Katika hali yake ya kiasili, chuma ni baridi, kigumu na cheusi, lakini kinapowekwa motoni, kinatupilia mbali sifa hizi na kuchukua sifa za moto ambazo ni joto, ulaini na angavu.

Tunaambiwa kuwa sharti tutoe kwenye Mfuko kwa moyo wa upendo na kujitoa dhabihu. Hii humaanisha kwamba, kwa sababu ya upendo wetu kwa Imani, tujinyime kitu fulani ili kwamba badala yake tuweze kuchangia Mfuko. Tunapofanya hivi, tunatoa dhabihu utashi wetu, raha yetu, matamania yetu binafsi, mwambatano wetu na vitu vya dunia hii, ili kwamba tuweze kupata sifa za ukarimu, kujitenga na upendo wa Mungu.

"Juu ya wazo la 'kutoa kile ambacho mtu anaweza kumudu,' hii kwa vyovyote haiweki mpaka au hata kuondoa uwezekano wa kujitoa dhabihu. Hapawezi kuwepo mpaka kwa michango ya mtu kwa Mfuko wa Kitaifa. Kadiri mtu anavyoweza kutoa zaidi ni bora zaidi,

hasa wakati sadaka kama hizi hulazimisha kujinyima matamania na shauku nyingine kwa upande wa mchangiaji. Kadiri sadaka inavyokuwa ngumu ndivyo itakavyostahili sifa machoni pa Mungu, bila shaka. Kwani cha maana siyo wingi wa michango ya mtu, bali kiwango cha kujinyima ambacho kinahusu sadaka kama hiyo. Ni moyo na siyo tu tendo la kuchangia, ambao wakati wote tuuzingatie tunapohimiza haja ya ushirikaji wa wote na msaada kamili wa moyo mkunjufu wa mifuko mbalimbali ya Hoja."

Kutoka kwa barua ilyoandikwa kwa niaba ya Shoghi Effendi

"Kuchangia kwenye Mfuko ni huduma ambayo kila muumini anaweza kuitoa, akiwa maskini au tajiri; kwani huu ni wajibu wa kiroho ambamo kiasi kinachotolewa siyo muhimu. Ni kiwango cha dhabihu ya mtoaji tu, upendo ambao kwao hutoa zawadi yake, na umoja wa marafiki wote katika huduma hii ambayo huleta uthibitisho wa kiroho."

Nyumba ya Haki ya Ulimwengu

"Kama Mlinzi mpendwa alivyoandika mnamo agosti 1957: "Wote, hata rasilimali zao ziwe ndogo jinsi gani, lazima washiriki. Juu ya kiwango cha kujitoa dhabihu kinachohusika katika michango hii ya watu binafsi, itategemea moja kwa moja ufanisi na ushawishi wa kiroho ambao haya mashirika machanga ya kiutawala, yaliyoubwa kupitia nguvu ya Baha'u'llah, na kwa ajili ya mpango uliobuniwa na Kitovu cha Ahadi Yake, yatatoa."

Nyumba ya Haki ya Ulimwengu

Mbaha'i wa Kihindi Mwenye Ugongwa wa Macho

Alikuwepo Mbaha'i mmoja maskini huko India ambaye aliugua ugonjwa wa mototo wa jicho katika macho yote mawili. Daktari alikuwa amemtahadharisha kwamba asingeweza kuona tena kama asingepasuliwa mapema na, kwa shida sana, aliweza kukusanya fedha kwa ajili ya upasuaji. Halafu, kwenye karamu ya Siku Kumi na Tisa, alisikia juu ya hitaji la haraka la fedha kwa ajili ya Nyumba ya Ibada ya Delhi. Alitoa fedha aliyokuwa ameweka kando kwa ajili ya upasuaji wa jicho lake.

Ilichukuwa muda mrefu mpaka baadhi ya Wabaha'i walikuja kujua juu ya dhabihu hii ya kustaajibisha ambayo muumini mwenzao alikuwa ameifanya katika kutoa muhanga macho yake kwa ajili ya kusaidia ujenzi wa Nyumba ya Ibada huko India.

5. Mfuko kama Msingi na Damu ya Uhai ya Imani

Mfuko wa Kitaifa umeelezwa na Mlinzi na Nyumba ya Haki ya Ulimwengu kama 'msingi' na 'damu ya uhai' ya mashirika ya Imani. Hii humaanisha kwamba utendaji kazi wa mashirika haya hutegemea juu ya Mfuko wa Kitaifa katika njia ile ile ambavyo nyumba hutegemea juu ya msingi wake na mtu hutegemea juu ya damu yake. Kama Mfuko wa Kitaifa siyo imara, hapo mashirika ya Imani hayatakuwa na nguvu na utendaji kazi wao utalega.

"Kadri shughuli zinavyopanuka, na hadhi yake vivyo hivyo kuongezeka ulimwenguni, asasi ya Mfuko wa Kitaifa, msingi ambao juu yake asasi nyingine zote lazima ziegemezwe na kusimamishwa, hujipaita umuhimu ulioongezeka, na sharti iendelee kusaidiwa kwa

wingi zaidi na jamii nzima ya waumini, yote katika uwezo wao mmoja mmoja na kupitia jitihada zao za pamoja, kama wamejiunda kama vikundi au kama mabaraza ya mahali. Utoaji wa fedha, katika usaidiaji wa Mfuko wa Kitaifa, hufanyiza, wakati huu, damu ya uhai ya asasi hizi changa ambazo mnaifanya kazi kuzisimamisha. Umuhimu wake hauwezi, kwa hakika, kukadiriwa mno. Baraka zisizohesabika bila shaka zitapamba kila jitihada ielekezwayo kwenye hatua hiyo.”

Shoghi Effendi: Maagizo ya Mlinzi, uk 31

Kamwe tuisahau umuhimu wa kazi tunayofanya na ukweli kwamba inaweza kufanywa tu na Wabaha’i. Huduma tuzitoazo kwa Imani, ikiwemo uchangiaji kwenye Mfuko, husaidia kujenga Ufalme wa Mungu duniani.

“... michango yetu kwenye Imani ndiyo njia ya uhakika kabisa ya kuondoa kabisa na kwa wakati wote mzigo wa njaa na taabu kutoka kwa binadamu, kwani ni kwa kupitia tu kwa utaratibu wa Bahá’u’lláh ... kwamba dunia inaweza kusimama kwenye miguu yake, na dhiki, woga, njaa, vita, n.k kufutilia mbali. Wasio Wabahá’i hawawezi kuchangia kwenye kazi yetu, au kuifanya badala yetu, hivyo wajibu wetu wa kwanza hasa ni kusaidia kazi yetu ya ufundishaji, kwa kuwa hii itaongozea kwenye uponyaji wa mataifa.”

Kutoka barua iliyoandikwa kwa niaba ya Shoghi Effendi, Maagizo ya Mlinzi

6. Upendo na Ushirikaji wa wote

Njia za Mungu siyo njia za watu. Kwa Mungu ni moyo unaotusukuma kutenda jambo ndio wenye maana. Ni mara ngapi

tunaambiwa jinsi Mungu anaweza kukuza matokea ya hata kitendo kidogo kabisa kinapotokana na upendo na uaminifu.

Wakati kila Mbahá'í – watu wazima, vijana au watoto – anapochangia kwenye Mfuko mara kwa mara na kwa kujinyima huleta baraka na mathibitisho ya Bahá'u'lláh siyo tu kwa watu wenyewe bali pia kwa jamii na asasi.

"Marafiki wote wa Mungu ... lazima wachangie kwa uwezo wao wote, hata sadaka yao iwe ndogo kiasi gani. Mungu haitwishi mzigo roho kupita uwezo wake. Michango kama hiyo ni lazima itoke kwa vituo vyote na waumini wote ... Enyi marafiki wa Mungu! Muwe na hakika kwamba badala ya michango hii, kilimo chenu, viwanda vyenu na biashara zenu vitabarikiwa kwa nyongeza nyingi, kwa thawabu njema na baraka. Yule ajaye na tendo moja jema, atapata thawabu mara kumi. Hakuna shaka kwamba Bwana aliye hai atawathibitisha kwa wingi wale wanaotumia mali zao katika njia Yake".

'Abdu'l-Bahá

"Uti wa mgongo wa Mfuko sharti uwe michango ya kila mara ya kila muumini. Hata ikiwa michango kama hiyo inaweza kuwa midogo kwa sababu ya umaskini wa wachangiaji, idadi kubwa ya kiasi kidogo kidogo huunganika kuwa mto mkubwa ambao unaweza kusogeza mbele kazi ya Hoja. Zaidi ya hayo umoja wa kujitoa dhabihu huchota mathibitisho ya Uzuri Uliobarikiwa."

Nyumba ya Haki ya Ulimwengu, Jumbe za Mwaka 1968 – 1673 kk 59-60

"Umoja wa waumini, matajiri na maskini sawia, katika msaada wao wa Mfuko utakuwa chanzo cha uthibitisho wa kiroho mkubwa kuliko tunavyoweza kuhisi."

Nyumba ya Haki ya Ulimwengu, Barua ya tarehe 17 septemba 1992

"Siri halisi ya ushirikaji wa wote imo katika matakwa ambayo yamerudiwa mara kwa mara ya Bwana kwamba marafiki lazima wapendane mmoja kwa mwingine, wahimizane daima mmoja kwa mwingine, wafanye kazi pamoja, wawe kama roho moja katika mwili mmoja, na kwa kufanya hivyo wawe mwili wa kweli, ulio hai, wenye afya uhuishwao na uangaziwao na roho. Katika mwili kama huo, wote watapokea afya ya kiroho na uzima kutoka kwa kiumbe hai chenyewe, na maua makamilifu kabisa na matunda yatatokea."

Nyumba ya Haki ya Ulimwengu, Jumbe za 1963-1968, uk.43

Soma hadithi zifuatazo:

Pete ya Mfungwa

Wabahá'i kutoka nchi nyingi walikuwa wamekusanyika kwa ajili ya kuweka wakfu Mashriqu'l-Adhkar ya Panama na Ruhiyyih Khanum alikuwa anawahutubia. Ghafla, bila kuwaza sana, alisema "Nadhani itapendeza sana kama tutatuma mchango ndogo kutoka kwenye kuweka wakfu Hekalu kwa ajili ya Hekalu la Kibaha'i lingine litakalo jengwa." Na alitoa kwa ajili ya kunadi, pete ndogo ya pembe ya ndovu ambayo ilikuwa imetengenezwa na kutumwa kwake na mfungwa Mbahá'i huko Msumbiji.

Kati ya waliokuwepo alikuwepo sonara mmoja kutoka Hawaii ambaye hakuwa tajiri sana lakini alitokea kuwa na kito kikubwa cha zamaradi. Alitoa kito hicho kwa ajili ya pete ya pembe ya ndovu. Katibu wa Baraza la Kiroho la Kitaifa la Panama alichukua dhima ya pete na kuhakikisha kwamba imewekwa katika pete ya dhahabu. Ndipo tena aliipeleka pete huko Haifa wakati wa Konvensheni ya Kimataifa ya mwaka 1973 na kumpa Ruhiyyih Khanum ambaye, badala yake, aliikabidhi kwa wajumbe wa Baraza la Kitaifa la Iran waliohudhuria Konvensheni. Aliwaambia "Ninalikabidhi Baraza lenu pete hii. Yeyote atakayelipa bei ya juu kabisa ataichukua, na huu utakuwa mchango wa kwanza kwa Mashriqu'l-Adhkar itakayojengwa baadaye katika mpango ujao.

Huko Iran pete ya zamaradi ilinunuliwa kwa kiwango cha kustaajabisha cha dola za kimarekani 100,000 (Tshs. 165 milioni). Pete hiyo ya pembe ya ndovu ya bei ndogo ambayo mfungwa wa huko Msumbiji alikuwa ametengeneza hununuliwa kwa bei ya chini ya dola moja, lakini upendo na uaminifu ambao alikuwa ameitoa, umefanya miujiza. Dola ilizidishwa zaidi ya mara mia moja elfu na ukawa mchango wa kwanza kwa ujenzi wa Hekalu mama Adhimu la India.

Rand Tatu na Senti Kumi

Miaka mingi iliyopita, sehemu fulani katika Afrika, jamii ya Kibaha'i ilitaka kutangaza Imani, lakini walikuwa maskini sana na hawakuwa na fedha yoyote. Siku ya karamu walijifunza kuhusu asili ya kiroho ya Mfuko wa Kibaha'i na jinsi mambo ya ajabu yanavyoweza kutokea kama marafiki wote wanachangia kwenye Mfuko. Walijifunza jinsi R 100 zilizotoka kwa waumini wote katika jamii zilikuwa na uwezo mkubwa zaidi kuliko R 1000 zilizotoka kwa Wabaha'i 3 au 4 tu. Walijifunza jinsi Majeshi ya Mbinguni yangewasaidia na jinsi ambavyo wangestaaajabishwa na baraka ambazo wangezipokea. Baada ya kujifunza haya, walijaribu. Jioni hiyo, kila muumini mmoja wa jamii hiyo – watu wazima, vijana na watoto – walitoa chochote kwa ajili ya Mfuko.

Walipata Rand Tatu na senti kumi. Wangepanya nini na kiasi kidogo hicho?. Halafu kijana chipukizi wa miaka 12 au 13 alisimama na kuwakumbusha kuwa Majeshi ya Mbinguni yangewasaidia. Hivyo jamii ilishauriana juu ya matumizi ya fedha hizo. Waliamua kununua kitabu kwa ajili ya maktaba yao. Mmoja wa wabaha'i alikichukua kitabu nyumbani kusoma. Alipokuwa ndani ya basi, akisoma kitabu, mwanaume mmoja akitiririkwa na maji ya mvua, aliingia ndani ya basi na kukaa karibu naye. Yule mwanamke aliyekuwa ameazima kitabu alimpa kisogo mtu huyo kukilinda kitabu kisilowe kwa maji na akaendelea kukisoma – hakutaka kuacha kusoma.

Yule mwanaume akamuuliza, "Unasoma nini? Mwanamke alikerwa kwa kusumbuliwa. Akajibu "kitabu". Mwanaume akasema, "kinaonekana kuwa kinavutia. Ni kitabu cha aina gani?". Mama alijibu, "kama ni lazima ujue basi ni kitabu cha Kibaha'i. Bila shaka utakuwa umeishasikia juu ya Imani ya Kibaha'i." "La, bado," mwanaume alijibu.

Ghafla yule mwanamke alitambua ni jinsi gani alikuwa ameonesha kiburi. Alibadilisha mwelekeo wake na kumwambia yule mwanaume kuhusu Imani na jinsi jamii yake ilitamani kutangaza kwa watu wa mji huo ujumbe wa Baha'u'lláh lakini hawakuwa na fedha za kutosha.

Yule baba alimwambia yule mwanamke kuwa yeye alikuwa mhariri wa gazeti. Kwa kawaida yeye huendesha gari kwenda nyumbani, lakini siku hiyo, kwa mara ya kwanza katika miaka mingi, aliamua kupanda basi. Aliomba aazime kitabu kile. Mwanamke akakubali. Alikipeleka nyumbani na kukisoma. Baadaye alikutana na Wabaha'i. Alifurahishwa sana hata akaamua kuandika makala katika gazeti lake kuhusu Imani; akaandaa mkutano wa hadhara katika jengo lake na mahojiano katika redio mbili na televisheni mbili. Kama Wabaha'i wangelipia matangazo yote haya ingewagharimu maelfu ya Rand. Lakini waliyapata yote haya kwa rand 3 na senti 10 tu.

